

欽定天文正義

欽定天文正義卷四十一

背宿占

觜宿占

史記天官書三小星隅置曰觜觿為虎首主葆旅事集解如淳曰關中俗謂桑榆孽生為葆晉灼曰葆菜也野生曰旅索隱姚氏案宋均云葆守也旅猶軍旅也言佐參伐以斬除凶也正義觜觿為虎首主收斂葆旅事也

宋史天文志觜觿三星為三軍之候行軍之藏府明則軍糧足將得勢動則盜賊行葆旅起暗則不可用兵

觀象玩占觜三星曰觜觿白虎之首金星也亦為刀鉞斬刈之事一曰天貨主寶貨其北上三尺為日月五星中道內主梁外主巳漢星明則天下安五穀熟動則天下旱

天文會通觜宿三星俱明三軍強盛一星暗一軍失將三星俱暗破軍殺將星光浮而數動搖者其國有亂軍

按觜宿三星其最北一星亦在黃道南十三度月五星皆不及犯觀象玩占謂其北上三尺為日月五星中逾較今測差少十度

彗孛客星見觜宿

漢書天文志彗星色白長丈在觜觿占曰必有破國亂君伏死其彗觜觿梁也

宋史天文志客星出入觜青為憂赤為兵黑為水白為喪黃白為吉彗星犯之兵起出入其分失地民流星孛之為

兵亂軍破其色與客星同占

觀象玩占彗見觜人流亡有破國 彗孛出觜大臣出戰栗
大貴有失地有破國彗孛犯觜國兵起天下動擾 客星犯
觜其國破亡石氏曰客星出觜魏有良臣在國客星入觜郗
萌曰有喪臣為逆一曰有徠旅之事于國內黃帝占曰西戎
侵邊車馬急行赤星入觜內臣外臣合謀為逆其星行動則
覺不動則事成客星守觜西戎有欲為王者又曰有水災人
多餓死一曰黑星守觜穀貴

天文會通彗出觜有水災又曰其國有兵亂亦曰三軍亂則
彗出觜彗星出入觜留舍不去三十日以上則天下兵起府

庫空虛彗星芒角可尋丈所犯觜其國有急兵亦曰軍士叛掠民財百姓受禍彗星如帚掃觜宿其國有兵喪彗星抵觜軍儲不繼三軍為亂一曰兵潰殺主將 孛星干守觜府兵亂大將死孛星犯觜其國有兵喪大人惡之暴兵四起一曰野有死將又曰有亡國有革政亦曰其國有內變又曰有彼黜大臣大水民飢府庫匱乏孛星抵觜其國破軍殺將有屠城 客星出觜三軍潰散主將失勢入觜國用空匱蓄積不實客星入抵觜主外奸入人君有憂客星凌犯觜歲飢年穀不登客星大如杯薄觜中其國有死大將亦曰有叛兵戮主將為亂客星犯觜大南其野有陰謀亦曰軍士匿謀犯主將

若久犯之而不去者大將死于亂軍中

流星出入觜宿

宋史天文志流星入犯觜有叛者有破軍

觀象玩占流星入觜中兵聚其下車馬急行出之則兵罷流星犯觜春夏多雨秋冬有大風雨人民多病

天文會通流星入觜諸侯有使來出觜天子遣人出疆流星抵觸觜其野奸使入境流星白如足練犯觜隆隆有聲如雷其國有急兵又曰刺客有陰謀

雲氣出入觜宿

宋史天文志雲氣犯觜赤為兵蒼白為兵憂黑趙地大人有

憂黃有神寶出

觀象玩占蒼白雲氣入觜有葆旅之事出之則禍除赤雲氣入之兵起赤氣如揚波入觜中兵入國火隨之入出觜兵隨之出黃白氣潤澤入觜有負寶玉來獻者

天文會通蒼氣入觜三軍有降者青氣入外國有來使或有降卒白氣入大臣有殊方來歸者

座旗

宋史天文志座旗九星在司怪西北君臣設位之表也星明則國有禮

天文會通座旗九星明則君臣有禮上下之分嚴暗則百官

有離心

按座旗九星其最南一星亦在黃道北十六度月五星皆不及犯

彗孛客星見座旗

天文會通彗星長丈所掃座旗其國無君若彗不及一丈大臣竊主柄 星孛座旗其國失君臣失道天下亂 客星犯座旗其國有兵變客星大如杯光芒抵座旗其國有奸臣擅君命以兵叛

流星出入座旗

天文會通流星抵觸座旗其國有犯上大臣失君臣禮若光

掩座旗不見臣侵主柄以事坐法

雲氣出入座旗

天文會通黃雲氣入座旗其國尊卑辨列上下交泰黑氣入之國有奸謀白氣入之有兵變

司怪

宋史天文志司怪四星在井鉞星前主候天地日月星辰變異鳥獸草木之妖明主聞災修德保福星不成行列宮中及天下多怪

月五星犯司怪

唐書天文志歲星犯司怪占曰水旱不時

天文會通月犯司怪有喪月暈司怪三重以上期三年有女
喪 木星犯司怪傷木德其國有憂 火星犯司怪傷火德
其國憂內亂 金星犯司怪傷金德其野有兵喪 水星犯
司怪傷水德其國歲飢民流亡 土星犯司怪傷土德其國
人君失信天下有離心 又曰月五星干犯司怪水旱為災
妖異四起

按司怪四星第一星在黃道北二度半第二星在黃道南
十二分月五星皆及犯之第三星在黃道南三度半弱第
四星在黃道南三度強月火土金水四星及犯之惟木星
不及犯

彗孛客星見司怪

觀象玩占彗孛出司怪多妖祥僻偽起 客星出司怪天下

多妖

天文會通彗星掃司怪若長丈所不有亡國必有死君 星
孛司怪掩星不見其國有亂臣 客星犯司怪有妖言以害

國政

流星出入司怪

天文會通流星抵觸司怪則天官失職被黜一曰臣下出疆

以按災異

雲氣出入司怪

天文會通黑雲氣入司怪妖言惑人心白氣入之為兵變

欽定天文正義卷四十二

參宿占

參宿占

史記天官書參為白虎三星直者是為衡石下有三星兑曰
罰為斬艾事其外四星左右肩膀也正義嘴三星參三星外
四星為寶沈子辰為申起之分野為白虎形也集解孟康曰
參三星者白虎宿中西直似稱衡晉灼曰三星少斜列無銳
形

宋史天文志參宿十星一曰參伐一曰天市一曰大辰一曰
鉄鉞主斬刈萬物以助陰陽又為天獄主殺秉威行罰也又
主權衡所以平理也又主邊城為九譯故不欲其動參為白
獸之體其中三星橫列者三將也東北曰左肩主左將西北

曰右肩主右將東南曰左足主後將軍西南曰右足主偏將
軍參應七將中央三小星曰伐天之都尉主鮮卑外國不欲
其明七將皆明大天下兵精王道缺則芒角張伐星明與參
等大臣有謀兵起失色軍散敗芒角動邊有急兵起有斬伐
之事星移客伐主肩細微天下兵弱左足入玉井中兵起秦
有大水有喪山石為怪星差戾王臣貳左股星亡東南不可
舉兵右股則主西北又曰參足移北為進將出有功徙南為
退將軍失勢三星䟽法令急

觀象玩占參七星為虎身伐為尾觜為首共為白虎主西方
一曰鍾龍金星也其左肩北三尺為日月五星中道暗小則

將弱芒角大張赤輝旁射則三軍駭動天子自將出征甘氏
曰參為忠良孝慎之子星明大則臣忠子孝改常則忠臣受
枉

天文會通參七星東北星不明左將有憂西北星不明右將
惡之東南星暗則後將軍失利西南星微則偏將軍當之

按參宿七星其最北一星亦在黃道南十六度月五星皆
不及犯觀象玩占謂其左肩北三尺為日月五星中道較
今測差少十三度

彗孛客星見參宿

宋史天文志彗星犯參邊兵敗貫之色白為兵喪 星孛于

參君臣俱憂國兵敗 客星入犯參國內有新刈事守之邊
州失地環繞者邊將有新刈事

觀象玩占彗孛出參伐甘氏曰大臣反兵蔽地鉄鉞用彗孛
犯參伐邊兵大散 客星入參邊有暴兵圍城夏氏曰穀貴
一曰諸候國當之客星出參鉄鑽兵出入參鉄鑽兵入客星
守參石氏曰歲飢郁萌曰有兵臣執主命馬貴客星入伐有
新刈之事於國出之有新刈之事於外客星守伐大臣有誅
者舍伐色黑為水白喪赤兵青憂黃為土功

天文會通彗星出參則兵火起大將失兵職彗出參中光芒
掩左右肩其國失大將軍一曰不有破軍必有死將彗抵參

中央三星其野有獄事亦曰大臣被執彗掃參伐光芒掩星
不見其國有邊釁一曰夷內侵中土擾彗星抵觸參宿人君
尚武亦曰禁兵有異謀 孛星犯參夷狄亂糴貴孛星出參
其國有廢政一曰兵火大作民不聊生孛星入參中其國有
死將夷狄盛強邊將有憂孛星抵觸參中其野有叛將軍士
離心孛星抵參伐其國有坐法大將一曰主將失權以事坐
罪 客星出于參民飢大將有棄市者入參三軍興土功事
一曰有兵事有邊釁客星守參秋冬大水客星抵觸參其國
大將有坐法者客星破參左肩星其國有大將誅若兩軍相
當大將先舉者勝客星破右肩星其下有繫獄將軍客星薄

參中其國破軍殺將亦曰邊將為亂客星凌參中央三小星其野有冤獄

流星出入參宿

宋史天文志流星入犯參先起兵者亡乙巳占曰流星出而光潤邊安有赦獄空

觀象玩占飛星入參外兵發一曰蠻夷使來郝萌曰邊城被圍一曰有銜石之事于國內乙巳占曰流星入參左五穀貴入參右五穀熟流星出參兵大出一曰有銜石之事於國外流星犯參邊兵起春夏犯名將死秋冬犯猛將用

天文會通流星入參外夷來貢流星出參將軍出征流星抵

參為旱為兵

雲氣出入參宿

宋史天文志青雲氣入犯參天子起邊城蒼白為臣亂赤為
內兵黃氣潤澤大將受賜黑為水災大臣憂白雲氣入出貫
之將死

觀象玩占蒼白雲氣入伐大將憂有新刈事赤雲氣如波揚
入參邊城倉庫災黃氣出伐將軍戰勝

天文會通蒼白氣出參其國災入參則夷狄來貢黃氣出參
則天子有使出入參則四夷有來貢獻者青雲氣出參四夷
來降

玉井

宋史天文志玉井四星在參左

按步天歌云玉井四星右足足陰觀象玩占亦作右

下主水泉以給庖厨動搖為憂

觀象玩占玉井四星在參右足下水官也其星微小如常則陰陽和五穀成明大動搖則大水天下飢

天文會通玉井四星占曰參足入玉井兵起若突出玉井則虎狼衆多害人玉井變色失常其野有兵起一曰邊兵作亂按玉井四星其最北一星亦在黃道南二十八度月五星皆不及犯

彗孛客星見玉井

宋史天文志客星入玉井為水為喪國失地出則國得地一云將出

觀象玩占彗星出玉井兵大起強國失地守玉井天下大水河海溢民多死于水客星入玉井強國失地郝萌曰有喪出玉井齊伯曰軍已出為憂有水收入守之三日以上其歲大水

天文會通彗星犯玉井天下多熟病死星孛玉井兵起邊境客星犯玉井其國水泉不通猛獸入城

流星出入玉井

宋史天文志流星入玉井為大水

觀象玩占流星入玉井中強國失地出之強國得地郝萌曰
有大流星入玉井不出其年大水以星大小遲速言之

天文會通流星犯玉井其國有外奸入境一曰有外暴至

雲氣出入玉井

宋史天文志雲氣入玉井色青井水不可食

觀象玩占白雲氣入玉井兵起赤黃氣潤澤入之有軍來降
天文會通黃氣入玉井其國大稔羅賊赤雲氣入之大旱黑
氣入之大水

屏星

宋史天文志屏二星一作天屏在玉井南一云在參右足星

不具人多疾不明大人寢疾星亡主多病

觀象玩占屏二星為屏風以障廁主疾病

按屏二星其北一星亦在黃道南三十九度月五星皆不及犯

彗孛客星見屏星

宋史天文志客星出于屏亦為大人有疾 彗星犯之水旱不時

觀象玩占彗孛出天屏大臣有誅者國有憂民疾病有徙國客星入屏四足蟲大疾出天屏輔臣有憂客星出入守犯天屏皆為疾病

天文會通彗星掃天屏衛士為亂彗出天屏輔臣有變謀
星孛天屏天子親戎服 客星守天屏人臣有離心客星逆
犯天屏其野有兵喪一曰有急兵

流星出入屏星

觀象玩占流星入屏星若犯之皆為人多死

天文會通流星抵觸天屏外奸入一曰衛士有異志

雲氣出入屏星

觀象玩占黑氣入屏大疫

天文會通黑雲氣出天屏其國有水災黃雲氣出天屏天子
以爵賜大將軍入天屏中天子得賢將青雲氣出天屏其野

有飢荒赤雲氣入天屏禁庭防火災白雲氣出天屏衛兵有亂

軍井

宋史天文志軍井四星在玉井東南軍營之井主給師濟疲之

觀象玩占軍_井四星在玉井南主給軍爨又主水旱一曰天井動搖有大水

天文會通軍井四星明則水泉足暗則水涸

按軍井四星其最北一星亦在黃道南三十五度月五星皆不及犯

彗孛客星見軍井

宋史天文志客星入軍井憂水害

天文會通彗星掃軍井光芒掩星不見者其國有白衣會又
曰有大兵 星字軍井其國有更王一曰有易政彗孛犯守
軍井兵起民流 客星犯軍井則有外奸入營一曰軍士有
匿謀客星大如杯守軍井五十日不下者其野有急兵客勝
主負

流星出入軍井

天文會通流星抵觸軍井其野有奸使入境流星入犯軍井
軍人災

雲氣出入軍井

天文會通黑雲氣入軍井其野有急兵白氣出之其野有兵
兵罷無兵兵起黃雲氣出之大將受賜入之出軍大勝舉事
無不利赤氣入之軍營有火災青氣出入軍井其野兵之食

天厠

史記天官書其南有四星曰天厠

按其承上文指鬻參言

正義天厠四

星在屏東主潤也占色黃吉青與白皆凶不見則人寢疾

宋史天文志厠四星在屏星東一曰在參右角南主潤色黃

為吉歲豐

觀象玩占天厠四星主天下疾病

天文會通天厠四星占民之安危黃潤光澤天下無失業之民暗及移徙則民不安堵

按天厠四星其最北一星亦在黃道南四十一度月五星皆不及犯

彗孛客星見天厠

宋史天文志客星入天厠為穀貴彗孛入歲飢

觀象玩占彗出天厠大人憂若厠中有伏兵犯入之天下飢客星入天厠天下大饑人相食民去其鄉都萌曰水大出黃白星入之天子有喜奇物見蒼白星入有陰病青星入有憂赤星入有內兵客星出天厠若守之王者憂

天文會通星孛天厠其野有兵喪 客星干犯天厠外兵入
塞一曰其野民不安居

流星出入天厠

觀象玩占流星入天厠天下饑一曰水

天文會通流星干犯天厠人多疾病

雲氣出入天厠

宋史天文志青雲氣入天厠為兵黑為憂黃則天子有喜

觀象玩占赤氣入天厠有兵出則禍除

天文會通黑雲氣入天厠則良民為盜白氣入之民捨耒耜
親戎服黃氣入之下民有暴貴者青氣入之民有飢色赤氣

入之天下大旱

天屎

史記天官書厠下一星曰天矢矢黃則吉青白黑凶正義天矢一星在厠南占與天厠同

宋史天文志天屎一星在天厠南色黃則年豐凡變色為蝗為水旱為霜殺物常以秋分候之星亡不見天下荒星微民多流

觀象玩占天矢一星主候吉凶黃帝占天矢明萬物有命星微則萬物不昌不見則人多病死一曰天天黑大人死常以春分日候之其色黃潤而明則人無疾天子安若青黑色則

國饑人病腹疾多死

按天屎一星在黃道南五十五度月五星皆不及犯

彗字客星見天屎

觀象玩占彗字客星出天屎若犯守之大人病腹死天下人亦多死者

天文會通彗星長丈餘掃天屎其國內弱威令不行彗星長三丈以上國有大喪 星字天屎其野主弱臣強一曰人主有疾病之憂彗字干守屎星天下弓矢用兵起中原 天屎星與客星芒角相及其野大饑荒一曰邊兵為亂

流星出入天屎

觀象玩占流星入天屎若抵之天下飢民多病

天文會通流星犯天屎色黃有赦色青有飢荒色白兵起色赤有喪

雲氣出入天屎

天文會通黑雲氣出入天屎國有大水歲飢民困黃氣其野有赦赤雲氣出天屎其國有兵喪

欽定天文正義卷四十三

井宿占

井宿占

史記天官書東井為水事其西曲星曰鉞索隱元命包云東井八星主水衡也正義東井八星于辰在未泰之分野鉞一星附井之前主伺奢淫而斬之占不欲明明與井齊或搖動則天子用鉞于大臣傷成鉞集解晉灼曰賊傷之占先成形于鉞

晉書天文志東井八星天之南門黃道所經為天之亭侯主水衡事法令所取平也王者用法平則井星明而端列

宋史天文志東井八星不欲明明則大水

觀象玩占東井八星曰天府一曰東陵一曰天井一曰天關

一曰天門一曰天渠一曰天亭一曰天侯一曰天齊一曰天
池水星也主水泉亦為天之南門日月五星貫之為中道又
主酒食女主之象主諸侯帝戚三公之位井星正而明則法
度正號令明明太盛則多風雨有大水暗小不正則國弱政
亂動搖變色則諸侯帝戚有廢戮三公受殃移徙則國亂君
憂洪水為災鉞一星附井口第一星邊二寸大而明則斧鉞
用兵起動搖芒角則大臣多死于法者星亡則天下大水
天文會通井宿南轅附一星曰鉞星光色明潤王道平法令
不繁天下和平若變色出怒角水衡之官被逐

月五星犯井宿

史記天官書禍成井集解晉灼曰東井主水事火入之一星居其旁天子且以火敗故曰禍也 正義月宿井有風雨之變

漢書天文志水木火三合于東井占曰内外有兵與喪改立王公東井秦也 金木合于東井占曰為白衣之會

後漢書天文志熒惑入東井口中為大臣有誅者

晉書天文志月犯東井距星占曰將軍死月奄井南轅西頭第二星占曰秦地有兵 填星入井大人憂行近距為行陰其占曰大水五穀不成 太白犯東井距星占曰國失政大臣為亂太白晝見在東井占曰為臣強秦有兵 熒惑入東

井占曰兵起國亂又曰貴臣相殘又曰無兵兵起有兵兵止
歲星犯東井占曰兵起 凡月五星犯井鉞悉為兵災一
曰斧鉞用大臣誅

隋書天文志月犯東井占曰有水災 熒惑犯東井北端第
二星占曰其國亂又曰大旱

唐書天文志辰星犯東井北轅辰星為廷尉東井為法令失
逆則相犯 歲星辰星合于東井占曰為變謀 太白辰星
合于東井占曰為兵謀

宋史天文志月犯東井將死于兵水官黜刑不平月犯井鉞
大臣誅有水事 歲星犯井主急法多獄訟水溢將軍惡之

犯井鉞近臣為亂兵起逆行入井川流壅塞 熒惑犯東井

兵先起者殃又曰天子以水敗入守經旬下有兵貴人不安

守三十日成句巳角動色赤黑貴人當之百川溢兵起 填

星入犯東井兵起東北大臣憂在背而去東井

按天文會通作去居東井

其下亡地 太白犯東井咎在將久守其分君失政臣為亂

辰星犯東井星進則兵進退則兵退刑法平

按觀象玩占作刑法不平

又曰北兵起歲惡芒角動搖色赤黑為水為兵起

觀象玩占月行至井變色而青國有憂赤有兵旱白有喪黑

大水黃有大風月宿井而霧有水患月白有喪風雨大水為

災一曰歲荒人飢月犯井左右星女主憂月犯井鉞斧鉞用

有拔城破軍殺將 歲星守井七日天下和平七日以上至
二十日之上有水災五穀傷有土功一曰秦國亂守其北多
暴雨黃帝占曰大飢人疾病郝萌曰大人多病有表一曰將
相死又為旱荊州占曰道上多死人一曰萬物不成乙巳占
木留守井其國以人仁致天下木守井環繞勾己之有穀不
入井黃帝占曰有軍在外歲星進則兵退星退則兵進又曰
天下有土功工川瀆之事一曰歲飢人病木犯井若中乘之
郝萌曰其國外内有兵起乙巳占曰人主有汎水之事大將
惡之木乘井而守之逆臣為亂木舍井居其東五穀不成居
其南諸侯多死居其西小兒多死居其北有改令木出入留

舍井三十日天下有水木逆行井石氏曰有兵木中乘守井
鉞斧鉞用大臣誅一曰賢相死熒惑守井三日責臣相戮
二十日以上宮中憂火滿六十日有大水魚行人道貴相死
郝萌曰火守井萬物不成石氏曰糴貴又曰天下名水有絕
者大旱大魚死巫咸曰有逐王火中犯乘井有兵陳卓曰臣
有以家事坐罪者李荃曰將死火入井甘氏曰其國凶米貴
民多死石氏曰有殺令黃帝占牛大疫兵器貴一曰山水出
海水溢國失火火以春入井有敵火入井太白隨之糴貴道
上多死人火逆行井貴人死傷有火災火犯守井鉞斧鉞用
大臣誅兵起臣謀主執法者死填星守井大旱五穀不成

黃帝占曰有水石氏曰有赦郝萌曰有土工甘石氏曰有壅
水人多病一曰民飢久守之金錢易守其陽旱守其陰水以
入日占國守之二十日兵起土舍井黃帝占有賜爵祿事留
三十日人災土入井居其中旱出之乃雨土守犯井鉞大臣
誅兵起 太白犯井海中占曰人主浮船乙巳占太白中犯
乘井皆為亂兵起太白入井郝萌曰先起兵者敗大水荊州
占將軍有死者一曰臣有謀上者大臣當其災太白入井中
留二十日以上六畜疾兵起太白守井糴貴石氏曰旱一曰
有火災太白逆行井有叛臣秦地殃金犯守井鉞斧鉞用大
臣誅國內亂兵起 辰星入井水災文曜鉤曰蠻夷君有死

者邊兵起一曰有亂臣馬貴辰星犯井石氏曰刑法不平已占水犯守色黃潤天子有善令色惡大人憂水守井黃帝占曰大水百川溢石氏曰熾旱早晚水又曰法臣相戮郝萌曰萬物不成金錢易一曰五穀霜死其分尤甚一曰其國大人惡之水逆行入井天下名水有絕辰者辰星犯守井鉞斧鉞用大臣誅兵起水災穀不成

天文會通月抵東井南轅主大將有憂抵井北轅主軍士離散木星逆入井宿秦地有兵喪火守井宿秦分有兵變大臣謀上若亡地又曰諸侯相攻火逆行守犯井距星其國有死將一曰有覆軍火行盈而抵井其國軍中有急政亦曰

大將有峻法三軍叛謀火行縮而抵井其國邊地有憂邊民受禍火入井經旬不出牛馬大疫兵起鐵貴又曰有赦令先起兵者大將戮土星抵井宿其國有曲法土星退行守井成勾己者土尅水旱災民病五穀不熟金星入井宿有兵兵起其野有兵火一曰秦分有兵謀金星經天抵井中其分有邊兵動不有破軍必有死將金逆行襲井距星其國有冤獄水星干犯井宿其國大水傷禾稼糴貴民飢水星逆犯守井其國有急兵亦曰有急政水星入井有赦又曰其分水衡之官以失職被逐

按井宿八星第一星在黃道南一度弱第五星在黃道北

二度第六星在黃道南一度強第七星在黃道南二度月
五星皆及犯之第二星在黃道南三度月與火土金水四
星及犯之第三星在黃道南七度弱第八星在黃道南六
度弱月與火金二星及犯之第四星在黃道南十度強月
五星皆不及犯祇一星在黃道南一度弱月五星皆及犯
之觀象玩占謂日月五星貫之為中道蓋謂井八星一星
在黃道北七星在黃道南日月五星皆能貫其中也

彗孛客星井宿

隋書天文志彗星見東井占曰大亂國易政

宋史天文志彗星犯東井民讒言國失政一曰大臣誅其分
兵火客星犯東井穀不登大臣誅有土功小兒妖言

觀象玩占彗孛出井有奸臣在若側其國大水兵大起軍在
外則大戰有死將其國大人死彗孛犯井武密占曰宮中有
亂秦地兵災客星入井水旱為災秦地喪亡一曰外邦有
使來獻食物者一曰五穀不成糴大貴一曰有陂隄若水事
一曰有水敗道路不通郝萌曰君失政臣為亂大人當之多
失火黃帝占客星入井留十日成勾已有贖罪之令客星犯
井國亂兵起郝萌曰百川溢客星出井有白衣自立者尋破
不成石氏曰有旱蟲生人多病赤星守井若入之貴人有疾
黑星守井若入之大水客星犯守井鉞斧鉞用大臣誅一曰

有兵將軍為外兵所擒士卒多傷死以星所居及其出之南北并其日辰占國

天文會通彗星如帚掃井宿距星其下有自立諸候又曰有強臣彗出井上白下赤如矛刃此為兵災彗星干犯井鉞星秦國受殃 星孛井宿上下相賊後有地震孛星抵井距星其國有軍覆將死之禍孛星出井有大使出中國者孛星觸井鉞星其野有更令光芒所射之宿其國除舊寘新 客星入井諸候使至或有相攻伐事客星守井距星其國有急兵亦曰有急政又曰有冤獄客星抵井宿其國有兵革亦各以色占之色赤兵事急色白兵以義起色青國飢兵亂色黃大

將受君賞色青黑為水災客星破井鉞為水患

流星出入井宿

宋史天文志流星犯東井在春夏則秦地謀叛在秋冬則宮中有憂乙巳占流星色黃潤國安赤黑秦分民流水災

觀象玩占流星入井水與城平天文論有使從外來言水兵事武氏占其分鉞流星出井其所至國大水武密占天子有水事於外乙巳占名水有絕者流星大而光衝犯井有大使至主憂春夏犯百川溢秋冬犯魚鹽賤

天文會通流星出井大臣受命出疆入井其野有兵流星抵井大人憂外國使至有陰謀流星出井鉞有節鉞出使事

雲氣出入井宿

宋史天文志蒼黑雲氣入犯東井民有疾疫黃白潤澤有客
來言水澤事黑氣入為大水常以正月朔日入時候之井宿
上有雲歲多水潦

觀象玩占青雲氣出井大如井口上拂參而行入河中大水
沒城郭期二十日遠三十日蒼白氣出井有水令入井民大
疫有喪黑氣入井民疾病多死喪赤雲氣入井大水不則疾
疫亦為旱一為水賊起白氣入井大雨水黃氣出井天子以
澤泉之利養民

五諸侯

宋史天文志五諸侯五星在東井北主斷疑刺舉戒不虞理
陰陽察得失亦曰主帝心一曰帝師二曰帝友三曰三公四
曰博士五曰太史五者常為帝定疑議星明大潤澤則天下
治五禮備則光明不相侵陵暗則貴人謀上芒角禍在中

觀象玩占五諸侯五星近北河土官也主扶顛持危發姦摘
伏察陰私隱匿之事星欲其均明明大潤澤大小齊等則王
者吉昌輔臣忠正差戾不明則忠良屏斥上下相猜動搖則
王者不安天下有憂春秋元命包曰移徙則外牧傷公卿逃
都萌曰五諸侯不見則貴人有謀主者張衡曰五諸侯赤則
豐暗則歉

天文會通諸侯五星躔拆則輔臣有離心就聚者則大臣懷奸謀

月五星犯五諸侯

宋史天文志熒惑犯之大臣叛不臣成太白犯之諸侯與兵亡國經天晝見則諸侯受誅

觀象玩占月犯諸侯有死者石氏曰火犯若守之兵起諸侯憂若有兵死者期三年火逆行犯守玉歷曰秦國不可與兵先起者亡後起者昌太白中犯乘守五諸侯兵起諸侯有死于兵者一曰金犯先舉兵者敗

天文會通月犯五諸侯天子失輔臣一曰將相憂火犯五

諸侯大臣懷貳以通奸謀 金星犯五諸侯大臣握兵以叛
按五諸侯五星第一星在黃道北十一度月五星皆不及
犯第二星在黃道北八度弱惟金星及犯之第三星五星
在黃道北六度弱月與金星及犯之第四星在黃道北五
度強月與火金二星及犯之餘不及犯

彗孛客星見五諸侯

宋史天文志客星犯王室亂諸侯亡地秦國殃守之諸侯親
屬失位 彗孛犯之執法臣誅又曰貴臣當之期一年

觀象玩占彗孛犯兵起王室亂一曰州牧反西方諸侯失土
一曰執政臣誅人主有憂 客星犯兵起出之大臣有憂若

執政得罪。一曰議臣有黜者。守之。大水。五穀貴。民道死。秦地尤甚。

流星出入五諸侯

觀象玩占流星入有喪以星入日占其國。

天文會通流星犯五諸侯。諸侯入觀若色白隆隆有聲如雷。則外有不庭之方。流星出五諸侯。則天子遣大臣出使。若色黃赤有聲。則天子問罪方伯。

雲氣出入五諸侯

宋史天文志。雲氣犯之色蒼白。諸侯有喪。不則臣有誅戮。天下有大水。

觀象玩占蒼白氣入五諸侯諸侯有黜者

天文會通黃雲氣出五諸侯天子賜大臣青赤氣出入之主
諸侯奪爵黑氣入之有坐誅輔臣白雲氣入之有以兵叛主
之大將

積水

宋史天文志積水一星在北河西北所以供酒食之正也不
見為災

觀象玩占積水一星在北河北一名聚水主聚美水以給天
子酒官其星明則天下安燕享禮行不明則五穀不登燕享
禮廢徭役繁多人民憂明大動搖則河海決溢津梁不通一

曰星明則水大出有論邑

按積水一星在黃道北十四度半月五星皆不及犯

彗孛客星見積水

宋史天文志客星犯之兵起大水大臣憂期一年

觀象玩占彗孛犯積水兵起大臣憂客星出積水天下水
溝為災有土功隄防之事

天文會通彗孛客星犯守積水大水泛漲

流星出入積水

觀象玩占流星抵積水若入之有大水舟楫用人飢

雲氣出入積水

宋史天文志蒼白雲氣入犯之天下有水

積薪

宋史天文志積薪一星在積水東北共庖廚之正也星不明五穀不登

觀象玩占積薪一星在積水東聚薪也以給享祀供庖廚其星欲明明則五穀熟享祀修庖廚足不明則庖廚空虛天下旱人飢國憂

月五星犯積薪

宋史天文志熒惑犯之為旱為兵為火災

觀象玩占五星犯積薪若守之五穀不成民飢流亡火守

犯川易道石氏曰庖官以火為憂甘氏曰五穀旱傷 金水
守犯兵起

天文會通月暈積薪期三日有暴風月掩之時多火災 金
守積薪將乏兵儲三軍爭食

按積薪一星在黃道北三度月與火土金水四星及犯之
木星不及犯

彗孛客星見積薪

宋史天文志客星守之薪貴

觀象玩占彗孛犯積薪有奸臣在宗廟 客星出積薪有以
薪藁之事致罪者犯守之有亂臣在宗廟

天文會通彗孛客星犯守積薪火焚薪彙主者有罪

流星出入積薪

觀象玩占流星抵觸積薪廚官憂

天文會通流星抵觸積薪貸粟使者入彊

雲氣出入積薪

宋史天文志赤雲氣入犯之為火災

觀象玩占赤氣入積薪火焚積聚

天文會通黑雲氣入積薪水傷禾稼黃雲氣出入積薪時和

歲豐

南河北河

史記天官書鉞北北河南南河正義南河三星北河三星分夾東井南北置而為戒

宋史天文志南河三星與北河夾東井一曰天之闕門也主開梁南河曰南戌一曰南宮一曰陽門一曰越門一曰權星主火而河戌間日月五星之常道也河戌動搖中國兵起河星不具則路不通水泛溢北河亦三星北河曰北戌一曰北宮一曰陰門一曰胡門一曰衛星主水

觀象玩占南河三星北河三星分夾東井兩河星明則天下安不明則四夷交侵動搖則邊兵大起星不具則有大水道不通南星不具則南道不通北星不具則北道不通

太白犯北河

宋史天文志太白舍北戌三十日為女喪有內謀守陰門不出百日天下兵悉起

觀象玩占太白乘北河戌若出北河北黃帝占曰皆為胡王死太白從南來南夷當之從北來北夷當之太白守北河戌甘氏曰邊戌有謀兵起關梁不通人主憂一曰四夷相犯

按南河三星其最北一星亦在黃道南十二度半月五星皆不及犯北河三星第一星在黃道北十度弱第三星在黃道北六度半強惟金星及犯之第二星在黃道北十度強月五星皆不及犯

彗孛客星見南河北河

宋史天文志客星守南河為旱為疫彗孛出為兵守為旱

客星入犯北河有喪于外姦人在中入自東兵起期九十
日入自西有喪期六十日守之為大水之災

觀象玩占彗孛出南河蠻越起兵邊戍有憂若闕吏有罪者
守南河大旱出北河戎狄兵起兵邊城憂守北河大水胡兵
入中國以敗去客星出南河蠻夷起兵道不通入南河旱
飢入北河有水災大饑郁萌曰客星入北河諸侯有奸謀一
曰胡為暴赤星守北河戒臣賊主大臣誅

流星出入南河北河

宋史天文志流星出為兵喪邊戍有憂流星經兩河間天下有難入為北兵入中國關梁不通

觀象玩占流星犯南河防戍有憂入北河巫咸曰為水為飢
一曰胡兵入

雲氣出入南河北河

宋史天文志蒼白氣入南河河道不通出而色赤天子兵向諸侯黃氣入之有德令出為災雲氣蒼白入犯北河邊有兵疾疫又為北主憂

觀象玩占蒼白氣入兩河戒間兵大起道路不通出河戒則禍除入北河邊兵起又為疾疫胡王死赤氣出兩河間天子

用兵于諸侯黃白氣入河戒間隨河行天子出德令逆河行
有客來求和親者赤氣入兩河戒間天下有難道路不通

四瀆

宋史天文志四瀆四星在東井南垣之東江河淮濟之精也
明大則百川決

觀象玩占四瀆四星明大動搖則大水泛溢

天文會通四瀆四星明大而有芒角大水為災

按四瀆四星其最北一星亦在黃道南十二度弱月五星
皆不及犯

彗孛客星見四瀆

天文會通彗星掃四瀆大臣有陰謀一曰四瀆當彗尾洪水行千里 星孛四瀆憂河防決 客星犯之洪水入都市 流星出入四瀆

天文會通流星入犯四瀆色青黑為水恚色黃赤有旱災雲氣出入四瀆

天文會通黃氣入四瀆則江河淮濟順流赤氣出之關津不通舟楫弛廢

水位

宋史天文志水位四星在積薪東一曰在東井東北主水衡觀象玩占水位四星在東井北西南列主水衡以洩淫溢水

官也石氏曰衡平尚水平而後流其星微小如常則雨澤時天下安明大則大水橫流五穀傷民以水飢變色失常則兵水俱興焦延壽曰水位上近北戌則國沒為河

天文會通水位四星明潤水官以職進秩星踈折則百川漲溢就聚則河失隄防暗及移徙則水傷禾稼

月五星犯水位

宋史天文志歲星犯之為大水一曰出南為旱熒惑守之田不治

觀象玩占五星犯守水位天下以水為害津梁阻塞一曰大水入城郭傷人民一曰五星守水位出其北大水出其南大

旱

按水位四星第一星在黃道南十度弱惟金星及犯之第二星在黃道南十度半弱月五星皆不及犯第三星在黃道南七度月與火金二星及犯之第四星在黃道南二度強月五星皆及犯之

彗孛客星見水位

宋史天文志客星犯之水道不通伏兵在水中一曰客星若水火守犯之百川流溢彗孛出為大水為兵穀不成

觀象玩占彗孛出水位人飢犯之水道不通有水賊客星犯水位大水河決一曰水賊起水官憂一曰臣下有謀兵起

天文會通彗孛客星犯守水位兵起暴水泛溢糴貴民飢一
曰水官以失職坐法

流星出入水位

宋史天文志流星入之天下有水穀敗民飢

觀象玩占流星入水位河溢

雲氣出入水位

宋史天文志赤雲氣入為旱飢

觀象玩占黑氣入水位大水

天文會通黃雲氣出入水位水官以職受賞赤氣入憂火災
白氣入水患民飢百姓為盜

天鐸

宋史天文志天鐸三星在五諸侯南一曰在東井北鐸器也主感饑溺以給貧餒明為豐暗則歲惡

月五星犯天鐸

觀象玩占五星犯守天鐸民飢

天文會通月五星干犯天鐸水旱為災

按天鐸三星第一星在黃道北三度弱月與火土金水四星及犯之第二星在黃道南十三分第三星在黃道北一度半月五星皆及犯之

彗孛客星見天鐸

天文會通彗孛客星入犯天鐸羅貴

流星出入天鐸

天文會通流星抵觸天鐸外夷遣使齎款

雲氣出入天鐸

天文會通黑雲氣入天鐸水傷禾稼青氣入之菜果不熟白
氣入之非時隕霜黃氣出入年穀豐

闕邱

史記正義闕邱二星在南河天子之雙闕諸侯之兩觀亦象
魏懸書之府

觀象玩占闕邱二星在南河東天子之象魏其星動搖則天

子宮闕間有變

天文會通闕卽二星明正則天子四門穆穆暗而動搖小人間雜

按闕卽二星其北一星亦在黃道南二十度半月五星皆不及犯

彗孛客星見闕卽

觀象玩占彗氣入闕卽巫咸曰宮闕之中有兵火起客星出闕卽宮闕之間有姦臣亦為有賊

天文會通彗孛客星犯闕卽兵戰

雲氣出入闕卽

觀象玩占赤氣入闕邱宮中火災

天文會通黃氣入闕邱天子宫闕有喜黑氣入之有奸臣

軍市

宋史天文志軍市十三星狀如天錢天軍貿易之市有無相通也中星衆則軍餘糧小

按觀象玩占作少

則軍飢

觀象玩占軍市十三星在參東南水官也

天文會通軍市十三星光明光澤則市易交通暗及動搖則三軍乏食

按軍市古謂十三星今只六星其最北一星亦在黃道南
四十一度強月五星皆不及犯

彗孛客星見軍市

宋史天文志客星入則刺客起將離卒亡

觀象玩占彗孛入軍市大兵起天下飢軍乏糧將士離散軍民多死亡客星入軍市軍中有刺客客星出入軍市軍中大飢將走士卒逃亡無軍在外客星出入軍市兵起

天文會通彗孛犯守軍市貨物不通軍民皆飢市中兵亂客星入軍市中近野雞三軍爭財為亂

流星出入軍市

宋史天文志流星出為大將出

觀象玩占流星入軍市軍無糧市散一曰有客使至軍中視

所從來以五色占之

天文會通流星犯軍市三軍爭食相戕

雲氣出入軍市

觀象玩占赤氣入軍市軍中大驚

天文會通黑氣入軍市財貨耗乏白氣入之邊兵起黃氣入之軍財富有

野雞

宋史天文志野雞一星在軍市中主變怪出市外天下有兵守靜為吉芒角為凶

觀象玩占野雞一星大將也主屯營軍之號令警急設備其

星明大則將勇兵強不明則將弱士卒離散芒角動搖則兵起荆州占曰野雞野將也主兵

按野雞一星在黃道南四十二度強月五星皆不及犯彗孛客星見野雞

觀象玩占彗孛犯野雞大將死軍士散諸侯相攻有亡國天文會通彗孛客星干犯野雞六畜死九州攻戰野將災流星出入野雞

觀象玩占流星抵野雞甘氏曰將死亡兵離散先起兵者殃天文會通流星抵觸野雞天子遣將出征

雲氣出入野雞

天文會通白雲氣入野雞星掩之不見邊兵動黑氣入之邊將憂

天狼

史記天官書其東有大星曰狼

按其東承上文謂參宿東狼角變色多盜

賊正義狼一星參東南狼為野將主侵掠占非其處則人相食色黃白而明吉赤角兵起

宋史天文志狼一星在東井東南色有常不欲動也芒角動搖則兵起明底兵器貴移位人相食色黃白為凶赤為兵

觀象玩占狼一星主殺掠一曰夷將一曰天陵主南夷主盜賊金官也其星色欲黃白無光芒不動搖則天下寧色赤而

大光芒四張動搖變色則天下亂兵起盜賊橫行百姓憂危
荊州占曰狼為賊盜弧為天弓以備盜賊故弧常射狼矢端
直則狼不敢動而盜賊不起狼又主羊又主狗巫咸曰狼星
易處則天下大飢兵滿野

按天狼一星在黃道南三十九度半月五星皆不及犯

彗孛客星見天狼

宋史天文志彗孛犯之盜起客星守之色黃潤為喜黑則
有憂

觀象玩占彗孛出天狼國有急兵大將出軍有憂若守之有
千里之行有大戰軍半死一曰有白衣之會客星守天狼

石氏曰夷狄來降郝萌曰邳失大臣色赤者得青黑者亡犯之狗大貴荊州占曰有圍城以入日占何國甘氏曰客星出天狼若守之天下起兵多盜賊將有千里之行

天文會通彗星掃天狼天下盜起若掩星不見則良民轉為盜賊天下大亂星孛天狼野將僭號客星犯狼星盜起郡邑良民受禍

流星出入天狼

觀象玩占流星抵狼兵起大將有千里之行將軍有死者黃帝占曰流星抵天狼破之秦國有殃先起兵者亡天文會通流星大如斗器出狼星旁其國有奸使

雲氣出入天狼

宋史天文志赤雲氣入有兵

天文會通青赤氣入天狼野將乏食蒼白氣入之野將掠郡邑黃雲氣入之野將受賞

弧矢

史記天官書下

按天狼下謂

有四星曰弧直狼正義弧九星在狼

東南天之弓也以伐叛懷遠又主備賊盜知奸邪者

宋史天文志弧矢九星在狼星東南天弓也主行陰謀以備盜常屬矢以向狼武密曰天弓張則北兵起又曰天下盡兵動搖明大則多盜矢不直狼為多盜引滿則天下盡為盜

觀象玩占。弧矢九星在狼東南。狼為姦寇。弧司其非。故常注矢以向狼。弧不張。矢不直。則天下盜賊橫行。黃帝占曰。弧矢主備。非常其星大而齊明。色黃潤澤。則天下息兵。變色失常。則天下兵起。狼旗七星。屈曲則夷狄可攻。狼旗者。弧也。荊州占曰。弧主武官。弧張迎戰者不勝。弧動先用兵者吉。後起兵者凶。弧色青黑。國有憂。洛書曰。狼弧張害及胡。又曰。黑帝之亡也。狼弧張衡曰。弧矢引滿。則君臣相謀。天下兵悉起。芒怒則四海交兵。

按弧矢九星其最北一星亦在黃道南四十六度月五星皆不及犯。

彗孛客星見弧矢

宋史天文志客星入南夷來降若舍其分秋雨雪穀不成守之外夷飢出入之為兵出入

觀象玩占彗孛出弧矢弓矢大用國亂民驚盜賊縱橫出狼弧間外夷反叛客星守弧矢野將死石氏曰主將弱郝萌曰外夷大飢有兵若弧星張則先起兵者利後起兵者不利出弧兵出入弧兵入王咸曰客星出弧若入之其國有兵大驚貴人多死士卒出行郝萌曰客星舍弧左右臣有何其君者

流星出入弧矢

宋史天文志流星入北兵起

觀象玩占流星入天弧弓矢貴秦負兵乙巳占流星犯衝弧
星夷狄兵動

雲氣出入弧矢

宋史天文志赤雲氣入之民驚一曰北兵入中國
觀象玩占黑氣入弧矢胡中疫作

老人星

史記天官書狼比地有大星曰南極老人老人見治安不見
常兵起常以秋分時候之於南郊正義老人一星在弧南為
人主壽命延長之應常以秋分之曙見于景春分之夕見于

丁見則國長命

觀象玩占老人明大而赤則人主壽昌老者安微小若不見則老人不安色黑白則老人災

按老人星在夏至後十度距赤道南五十二度若北極高三十六度則春分之曙秋分之夕老人星當正午地平上二度天氣晴明則見若三十六度以南則老人星高每年皆見三十六度以北則老人星在地平下必無見理占家以見為福殆不足信又按老人星在黃道南七十六度月五星皆不及犯

彗孛客星見老人星

宋史天文志客星入為民疫一曰兵起老者憂

觀象玩占彗出老人老人不康客星犯老人則天下老人
災兵起入老人為政不和入守之石氏曰人疫兵起老人行
出老人兵起老人不安客星色黃潤光澤守之黃帝占曰是
謂扶老其國安老人昌

流星出入老人星

宋史天文志流星犯之老人多疾一曰兵起

觀象玩占流星出入老人老人有憂疾海中占流星抵老人
兵起乙巳占流星犯衝南極老人天下大安風雨順時天子

壽昌

丈人

宋史天文志丈人二星在軍市西南主壽考悼老矜寡以哀窮人星亡人臣不得自適

觀象玩占丈人二星在軍市南國之老臣也其星不見則黎老之情不通

天文會通丈人二星黃潤有常大臣有及百歲者一曰朝廷重臣皆老成變色失常大臣有非命者

按丈人二星其北一星亦在黃道南五十七度強月五星皆不及犯

彗孛客星見丈人

觀象玩占彗孛犯丈人老臣憂

天文會通彗孛客星干犯丈人大臣廢黜客星抵丈人有

邊將以兵亡者

流星出入丈人

天文會通流星干犯丈人臣下憂災

雲氣出入丈人

天文會通黃雲氣出丈人大臣加秩黑氣入臣坐獄白氣入
將以兵終青氣出大臣為監赤雲氣入其國有火災

子星彗星

宋史天文志子二星在丈人東侍丈人側不見為災孫二

星在子星東以天孫侍丈人側相扶而居以示孝慈不見為災居常為無咎

天文會通子二星明潤則天下戶口滋多疎拆則國多流徙之民暗及移徙則民憂孫二星明潤則天下繁盛生民尚禮儀星亡則民為盜賊星疎拆則生民流徙暗及移徙兵起民受其殃

按子二星其北一星亦在黃道南五十七度強孫二星其北一星亦在黃道南五十八度月五星皆不及犯

彗孛客星見子星孫星

天文會通彗孛客星干犯子星天下之人多不肖之行而老

者失其養 彗孛掃孫星其國歲荒滅戶口 客星干犯孫
星其國民耗守五十日不去民勞為亂

流星出入子星孫星

天文會通流星抵觸孫星其國民有災

雲氣出入子星孫星

天文會通黃雲氣繞覆子星天下民庶富黑雲氣掩子星其
野大水傷戶口白氣入之兵殺戶口青氣入之天下飢黃雲
氣入孫星其野有承祀之裔生青白氣入之為亂赤氣入之
國有陰謀子孫

水府

宋史天文志水府四星在東井西南水官也主隄塘道路梁溝以設隄防之備

觀象玩占水府四星明大異常則有大水災他星犯之占同水位

天文會通水府四星占與水位同主水之官星明潤水官進職踈拆則百川漲溢就聚則河失隄防暗及移徙則天下大水

月五星犯水府

宋史天文志熒惑入之有謀臣

天文會通五星犯守水府水境郡邑

按水府四星第一星在黃道南九度弱第二星在黃道南九度強惟金星及犯之第三星四星在黃道南七度強惟火金二星及犯之餘不及犯

彗孛客星見水府

宋史天文志客星入天下大水

天文會通彗孛掃水府掩星不見河海有暴水溢糴貴民飢
星孛水府水官以失職坐法 客星入水府河決

流星出入水府

宋史天文志流星入色青所主之邑大水赤為旱

天文會通流星出水府色青白所之邑大水色黃赤所之邑

大旱

雲氣出入水府

天文會通黑雲氣入水府大水白雲氣入之民以水荒為盜
黃雲氣出水府則水官以職受賞